

KALATAS

OPISYAL NA PAHAYAGAN NG REBOLUSYUNARYONG MAMAMAYAN
NG TIMOG KATAGALUGAN

TOMO 33 BLG. 3

Basahin at Talakayin

Hulyo 2005

Samantalahin ang umiigting na krisis ng naghaharing sistema upang ibayong palakasin ang rebolusyunaryong kilusan sa rehiyon


Mag-ambag sa pambansang pagsisikap na mapabagsak ang rehimeng US-GMA

Mabilis na nahihinog sa panibagong pagkakataon ang krisis ng naghaharing sistema. Sa pagkabulgar ng iskandalo sa *jueteng payola* kung saan pangunahing sangkot ang asawa, anak at bayaw ni Gloria Macapagal-Arroyo (GMA) na nasundan pa ng nakatutulig na bomba ng pagbubulgar hinggil sa wire-tap-

EDITORIAL

ping incident ng ginawang pan-daraya ni GMA sa nakaraang eleksyon, nakatakdang sumambulat ang kasalukuyang krisis pulitikal sa isang panibagong pagsiklab ng krisis panlipunan na kahalintulad ng nagpabagsak sa rehimeng Marcos noong 1986 at rehimeng Estrada noong 2001.

wasyon ngayon noong Nobyembre hanggang Disyembre 2000 kung saan ang pagkalantad ng *jueteng payola* sa mismong presidenteng si Estrada ang nagsilbing mitsa ng mga protestang masa. Tumungo ito sa tuluyang pagbagsak ng rehimen noong Enero 2001 sa pamamagitan ng nagsamang higitang mga protesta at *withdrawal of support* ng isang paksyon ng militar kay Estrada.



Nasa pinakaibuturan ng panlipunang krisis na ito ang walang kasing-sahol at ang mabilis pang bumubulusok na krisis sa ekonomya ng sistemang malapyudal at malakolonyal. Nagngangalit ang damdamin ng mamamayan sa bago na namang bugso ng pagtaas ng presyo ng langis at mga pangunahing bilihin. Patuloy ang pagbagsak ng halaga ng piso kumpara sa dolyar at ng tunay na halaga ng sahod. Higit na dumarami ang nawalan ng trabaho.

Maihalalintulad ang sit-

Tulad din noong 1986 at 2001, ang magkatambal na popular na pag-aalsa ng mamamayan na nasa pamumuno ng malawak na hanay ng nagkakaisang prenteng anti-Arroyo, sa isang panig at ng *withdrawal of support* ng isang paksyon ng reaksyunaryong militar ang tanging magpapatalsik sa rehimeng Arroyo.

Tulad din sa nakaraan, may sentral na papel ang US na pahupain ang hidwaan sa hanay ng magkakaribal na paksyon at paliitin ang pinsala at ng maaaring ilubha pa ng marahas na bangga sa pagitan ng mga reaksyunaryong paksyon ng naghaharing uri. Sa tayo ng mga

Sundan sa kasunod na pahina ►

◀ *Mula sa nakaraang pahina*

bagay, patuloy lamang na nakakapanatili sa paghahari ang rehimeng Arroyo dahil sa basbas at suportang ibinibigay ng imperyalismong US sa anyo ng mga ayudang militar at ekonomiko. Samantala, pinanatili ng US ang ugnay sa iba pang reaksiyunaryong paksyon bilang mga reserbang pyesa sa larong ahedres sakali mang maoobliga itong bitiwan na si Arroyo bilang nangungunang papet sa Pilipinas at kinailangang magsagawa ang US ng *political gambit* para isakripisyo ang reyna pero napananatili

KALATAS

**Hulyo 2005
Tomo 33 Bilang 3**

NILALAMAN

- 1** Editorial: Samantalain ang umiigting na krisis ng naghaharing sistema upang ibayong palakasin ang rebolusyunaryong kilusan sa rehiyon
- 4** Pakikibaka ng mamamayan ng TK para sa pagpapataksik kay Gloria, lumalawak, lumalakas
- 5** Dagdag na sa sahod sa TK: Mistulang paglilimos
- 6** Deregulasyon at liberalisasyon ng industriya ng palay sa Pilipinas-pakana ng mga imperyalista
- 8** Tutulan at labanan ang mga dambuhalang dayuhang korporasyon at kanilang HYVs
- 10** Halaw sa isang pahayag ng mga maglulukad
- 12** Mga Balita

Ang **KALATAS** ang opisyal na pahayagan ng rebolusyunaryong mamamayan ng Timog Katagalugan. Pinapatnubayan ito ng Marxismo-Leninismo-Maoismo. Inilalathala ito ng Partido Komunista ng Pilipinas (MLM) at ng Bagong Hukbong Bayan ng Timog Katagalugan.

Inaanyayahan ng Pamatnugutan ang mga mambabasa na mag-ambag sa pagpapahusay ng ating pahayagan. Magpadala ng mga komentaryo at mungkahi, balita at rebolusyunaryong karanasan na maaaring ilathala sa ating pahayagan.

Maaaring makuha ang pinakahuling isyu ng ating pahayagan sa internet. Magtungo sa

http://www.geocities.com/kalatas_st/index.html

Tumatanggap din ng mga liham sa

kalatas_st@yahoo.com

ang kontrol sa ekonomiya't pulitika ng bansa.

Subalit itinuturo din sa atin ng karanasan, na gaano man kamakapangyarihan ang US, hanggang sa isang antas lamang nito maiimpluensyahan ang pagbukadkad ng mga opurtunidad at di mapipigilang pagsambulat ng krisis sa ekonomya at pulitika. May sari-sariling galaw ang iba't ibang pampulitikang pwersa at mga progresibo't patriyotikong pwersa sa nagkakaisang prenteng anti-Arroyo katulad din na may sariling galaw ang batas ng krisis ng naghaharing sistema na labas at independyente sa kagastuhan ng US.

Sakaling humantong ang malalaking protestang masa sa pagbabagsak kay GMA, dapat igiit ng demokratikong mga uring nagpatumba sa pasistang rehimeng Macapagal-Arroyo ang isang demokratikong konseho ng mamamayan na aaktong isang gubyernong transisyunal upang magbigay daan sa panibagong eleksiyong maghahalal sa bagong presidente at bise presidente at mga delegado sa kumbensiyong konstitusyunal para pagtibayin ang isang bagong saligang batas na tunay na magtataguyod sa demokratikong interes at aspirasyon ng lahat ng mga demokratiko at progresibong mga uri sa lipunan.

Kaugnay nito, marapat lamang na mag-ambag ang rebolusyunaryong mamamayan ng Timog Katagalugan ng kakayanin nito sa pambansang pagsisikap na masamantala ang krisis ng naghaharing sistema. Sa harap ng panibagong pagdaluyong, di dapat mawala ang pagtanaw ng bawat rebolusyunaryo at mahigpit na panghawakan ang ating tungkulin sa kasalukuyang panahon.

Kailangang puspusang likhain ng mga rebolusyunaryo sa rehiyon ang malawak na paglaban ng mamamayan sa rehimeng GMA at itransporma ang bawat opurtunidad tungo sa opensibang pagpapalawak at pagpapalakas ng rebolusyunaryong kilusang masa at armadong pakikibaka.

Kaugnay ng tungkuling ito, kinakailangang patuloy na paunlarin ng mamamayan ng rehiyon ang iba't ibang anyo ng paglaban at ibunsod ang mga malalaking

Sundan sa kasunod na pahina ►


◀ *Mula sa nakaraang pahina*

mobilisasyong masa na bibigwas sa paghahari ng rehimeng Macapagal-Arroyo! Tulad rin ng malaking papel na ginampanan ng rehiyon sa pagpapadaluyong ng mga kilos-protesta sa Kamaynilaan noong panahon ng pagpapabagsak kay Marcos at Estrada. Muling gagampan ng mapagpasyang papel ang mga taga TK sa mga lansangan bilang isa sa mga rehiyong sumusulong ang pakikibaka ng mamamayan at nasa tarangkahan ng sentrong luklukan ng reaksiyunaryong kapangyarihan.

Katuwang ng naunang tungkulin, marapat na buong husay na pumagitna ang mga rebolusyunaryo at progresibong pwersa sa kumukulong sitwasyon at agresibong magbukas ng pakikipagtulungan sa iba't ibang positibong pwersang pampulitikang anti-GMA. Mahusay na gamitin ang sitwasyon upang masagpang ang lahat ng opurtunidad para magpalawak at kumabig ng impluwensya sa pamamagitan ng pagtatayo ng iba't ibang tipo ng alyansa at ugnayang bilateral at multilateral, hayag at lihim, ligal at iligal. Kailangang paigtingin ang ugnay at pakikipagtulungan sa mga pwersang anti-Arroyo upang mamaksimisa ang kanilang suporta para sa higit pang pagpapalakas nang walang insinasangkalang interest ng mamamayan.

Subalit sa tindi ng krisis ng naghaharing sistema, di maisa-isang tabi ang banta upang gumawa ang mismong rehimen at/o mga adbenturista sa hanay ng reaksiyunaryong militar ng isang kudeta upang ipreserba ang naghaharing sistema. Di nalalayong gagawa ng pinakamarahas na pasistang pagsupil para alisin ang lahat ng banta sa kanyang paghahari. Lagi't laging tatapatan ng mga militarista at pasista ng kontra-rebolusyunaryong karahasan ang bawat rebolusyunaryong sitwasyon.

Kaugnay nito, kanakailangang ihanda ang buong rebolusyunaryong hanay sa pinakasukdulang senaryo ng kontra-rebolusyunaryong kudeta at pagpapataw ng pasistang paghaharing lagim. Sa sitwasyong ito, dapat puspusang maghanda upang mapreserba ang kilusang lihim sa kalunsuran. Kailangang pangalagaan ang kaligtasan ng rebolusyunaryong kilusang masa. Sa sitwasyong umiiral ang lantarang pasistang paghahari, kailangang maging handa upang idirehe ang organisadong pag-atras sa mga sona at larangang gerilya ng lahat ng



bulnerable habang pinipreserba ang sapat na bag-as para pamunuan at idirehe ang mga rebolusyunaryong aktibidad at paglaban sa kalunsuran.

Kinakailangan ding maitransporma ang lahat ng aanihing ganansya sa pakikibaka sa rehimeng US-GMA sa solidong lakas ng mamamayan para sa higit pang pagpapaigting ng armadong pakikibaka sa rehiyon. Kaya't kaalinsabay ng mga naunang tungkulin, ubuskayang isulong ang mga rebolusyunaryong gawain sa kanayunan.

Nakaangkla sa kanayunan ang tuluy-tuloy na pagpapalakas ng rebolusyon. Kaya't sa bawat pagsikdo ng krisis ng naghaharing sistema, kinakailangang may katugong ibayong paglakas ng mga rebolusyunaryong gawain sa kanayunan. Dapat samantalain ng mga rebolusyunaryo sa kanayunan ang pagsahol ng krisis ng malapyudalismo para sa ibayong pagpapalawak at pagpapalakas.

Kailangang buong sikhay na tupdin ng lahat ng yunit sa ilalim ng Melito Glor Command-Bagong Hukbong Bayan-TK ang mga tungkulin sa pagtatayo ng baseng masa, pagsusulong ng rebolusyong agraryo at pagpapaigting ng armadong pakikibaka. Kaugnay nito, kailangang mabilis na makapagparami ng kasapian mula sa mga mamumulat sa pakikibakang masa na handa nang yumakap sa pinakamataas na anyo ng pakikibaka, ang armadong pakikibaka. Mabilis ding palawakin at palakasin ang mga larangang gerilya at isulong ang malaganap at masinsing pakikidigmang gerilya. **K**

Pakikibaka ng mamamayan ng TK para sa pagpapataalsik kay Gloria, lumalawak, lumalakas

Nasusuka na ang mamamayan ng Timog Katagalugan kay Gloria. Sinasalamang ito ng mga nabuong alyansa at organisasyong nanawagan at nakikibaka para sa pagpapataalsik sa sagad-sagarang papet ng imperyalismong US, pasista, magnanakaw at sinungaling na si Gloria.

Mula nang mabunyag ang eskandalo sa *jueteng payola* at ang Hello Garci CDs, tila mga kabuteng nagsulputan ang mga alyansa at organisasyong nagnanais mapataalsik si Gloria sa poder.

Itinayo sa rehiyon ang isang multisektoral na alyansang tinaguriang Southern Tagalog for the Ouster of Gloria (STOP Gloria). Kaanib dito ang libu-libong manggagawa, magsasaka, mangingisda, katutubo, kabataan, kababaihan, taong simbahan, mga propesyunal, negosyante at mga pulitikong anti-Arroyo kabig ang kanilang mga organisasyon at alyansa.

Ayon sa nakalap na impormasyon, mahigit sa tatlong daang delegado ang dumalo sa pagbubuo ng STOP Gloria noong Hulyo 9 sa Calamba City. Itinayo ang panrehiyong *protest camp* ng alyansa sa Central Terminal sa Crossing bilang hudayat ng malawakang

kampanya sa pagpapataalsik kay Gloria sa buong rehiyon.

Isa sa mga nanguna sa pagbubuo ng STOP Gloria ang Worker's Alliance for the Immediate Stepping Down of Gloria o WALIS-Gloria, isang alyansa ng mga manggagawa dito sa TK. Ipinanawagan ng alyansang ito sa halos lahat ng mga enklabong industriyal, pagawaan at komunidad ng mga manggagawa ang pagwalis kay Gloria sa pagka pangulo.

Umalingawngaw na rin ang pangangalampag ng mga magbubukid sa mga kanayunan ng rehiyon. Pormal nang naitayo nitong Hunyo 27 at sumisikad na ang kampanya ng Kanayunan Laban sa Magnanakaw at Pekeng si Gloria o KALAMPAG, isang malapad na alyansa ng mga magbubukid sa rehiyon.

Di na rin nakapagtataka na magsulputan ang ibang pang sektoral at pamprubinsiyang alyansa at mga organisasyon na humuhiling sa pagpapataalsik kay Gloria sa pwesto. Sa hanay ng mga artista at manunulat, naitayo ang Artist for the Removal of Gloria o ARREST-Gloria.

Nabuo na rin ang Laguna Laban kay Gloria o LAGLAG. Nasa ilalim ng pamprubinsiyang alyansang ito ang iba't ibang organisasyon at alyansang sumasaklaw sa iba't ibang bayan at lungsod sa Laguna. Kabilang dito ang United Movement Against Gloria Arroyo (UMAGA) ng Calamba City; Movement Against Gloria o MAG ng Sta. Rosa, Biñan at San Pedro; at Kampana ng Cabuyao.

Sumusulong din ang pakikibaka ng Batangas Consultative League Against Gloria o BACLAC, ng Rizal Alliance for Gloria's Exit o RAGE at Malayang Alyansa ng Mamamayang Palaweño na Ayaw kay Gloria o MALAMPAYA.

Nabuo na rin ang Quezon Unity in Throwing Gloria Out o QUIT GLO nitong Hulyo 19. Nakaplanong itayo na ngayong ikatlong linggo ng

Sundan sa kasunod na pahina ►



Kinalampag maging ang Makati - mga miyembro ng alyansang Kalampag sa isang rally noong Hunyo 24

Mistulang paglilimos

Manggagawa nakahanda na sa paglulunsad ng mga welgang bayan upang ibagsak ang rehimeng US-Arroyo

Isinasadlak ng rehimeng US-Gloria Macapagal-Arroyo (GMA) sa kalunus-lunos na kalagayan ang mga mangggawa sa Timog Katagalugan. Insulto sa mga manggagawa ang ipinatupad na P13 hanggang P22 na dagdag sa arawang sahod na hinati pa sa dalawang bugso. Malayung-malayo ito sa P125 na kahilingan ng mga manggagawa sa buong bansa.

Ayon sa inilabas na anunsyo ng Regional Tripartite Wages and Productivity Board (RTWPB) ng rehiyon noong Hunyo 3, ipapatupad ang P22 pagtataas sa arawang sahod. Epektibo noong Hunyo 16, makatanggap ang mga manggagawa sa mga bayan, lunsod at mga probinsiyang saklaw ng Cavite, Laguna, Batangas, Rizal at Quezon (CALABARZON) na ikinakategoryang *extended metropolitan area, growth corridor area, emerging growth area* at *resource-based area* ng P10 dagdag sa arawang sahod. Sa pagsapit ng Enero 1, 2006, makatanggap muli sila ng P12, P7, P5 at P3 na dagdag ayon sa pagkakasunud-sunod.

Sa bagong pagreklasipika ng Department of Labor and Employment (DoLE) na ipinatupad noong Nobyembre 1, 2004, ang mga manggagawa lamang sa mga bayan ng San Pedro at Biñan sa Laguna at Imus at

Bacoor sa Cavite ang makatanggap ng P22 na dagdag. Tatanggap lamang ng P13 - P17 dagdag ang mayorya ng mga manggagawa sa rehiyon.



Mula sa dating P255 na minimum na sahod, tatanggap ang mga manggagawa sa mga naturang bayan ng P277 sa susunod na taon. Katumbas lamang ito ng 8.6% dagdag sa loob ng isa't kalahating taon. Di hamak na mas mababa ito sa karaniwang tantos ng implasyon na di bumababa sa sampung porsyento taun-taon.

Pagbuhos ng malamig na tubig

Ayon sa Pagkakaisa ng Manggagawa sa Timog Katagalugan-Kilusang Mayo Uno (Pamantik-KMU), isa lamang ang layunin ng hakbang na ito. Nais nitong buhusan ng malamig na tubig ang mainit na pakikibaka ng mga manggagawa sa rehiyon para sa pagsasabatas

Sundan sa kasunod na pahina ►

◄ Mula sa nakaraang pahina

Hulyo ang mga *protest camp* ng QUIT GLO sa halos lahat ng mga sentrong bayan sa probinsiya pangunahin sa Lucena City.

Iba't ibang tipo ng pagkilos ang inilulunsad ng mga nasabing alyansa upang imulat, organisahin at mapakilos ang mamamayan ng TK para sa kampanya ng pagpapataksik kay Gloria. Pinapangunahan nila ang pagtatayo ng mga *protest camp*, pagdaraos ng mga *rally*, *mobile propaganda teams*, *petition signing*, *noise barrage* at marami pang ibang tipo ng pagkilos.

Sa pagkilos noong Hulyo 13, mahigit sa 1500 mamamayan ng TK na kaanib sa STOP Gloria at iba pang alyansa ang dumalo. Di pa nakasama rito ang ilang daan pang hinarang ng mga militar at pulis sa iba't ibang *check points* sa rehiyon partikular sa Quezon upang di makarating sa Makati.

Umaalingawngaw na rin sa rehiyon ang panawagan para sa malawakang pagkilos ng mamamayan sa mismong araw ng State of the Nation Address (SONA) ni Gloria sa ika-25 ng Hulyo sakali mang tumagal pa siya sa pwesto hanggang sa petsang ito. **K**

Tutulan at labanan ang mga dambuhalang dayuhang korporasyon at kanilang HYVs

Matinding pagsasamantala mula sa mga malalaking dayuhang korporasyon ang dinaranas ng mga magsasaka at manggagawang bukid sa mga palayan sa rehiyon. Direkta nilang pinakikialaman ang produksyon ng palay sa bansa. Di nasasapatan ang mga ito sa pagsasamantalang iniluluwal ng mataas na presyo ng kanilang mga produktong ibinebenta sa mga magsasaka.

Pinanghihimasukan ng mga korporasyong ito ang produksyon ng palay sa buong mundo kabilang ang ating bansa. Una, sa pamamagitan ng pagkontrol sa teknolohiya at proseso ng produksyon; ikalawa, pagkontrol ng binhi; at ikatlo, pagkontrol ng kalakalan sa pandaigdigang saklaw. Nagiging bahagi na rin nito ang pagkontrol sa aspeto ng pananaliksik.

Nangunguna sa mga dambuhalang *agri-business* na korporasyon ang Monsanto (US), Du Pont (US),

◀ *Mula sa nakaraang pahina*

sa kongreso ng P125 dagdag sa arawang sahod. Subalit di kakayanin ng paglilimos at panunuhol na ito na buwagin ang natipon nang lakas ng mga manggagawa para sa kampanya sa pagpapataas ng sahod.

Nakikiisa sa pananaw na ito ang Southern Tagalog Wage Increase Solidarity (ST-WINS), isang alyansa para sa kampanyang dagdag na sahod. Ayon sa alyansa, alipin ang turing ng rehimeng US-GMA na naobligang magbigay ng limos sa mga kinakawawang obrero. Ipinanawagan ng alyansa na buwagin na ang mga *regional wage boards* dahil mapanghati ang mga ito at di nagsisilbi sa interes ng mga manggagawa.

Ayon naman sa mga manggagawa ng Cavite, “nagtatrabaho ang marami sa amin ng labing dalawang oras bawat araw subalit nakasadlak pa rin kami sa kahirapan. Wala kaming ibang masasandigan kundi ang pagbubuo ng mga tunay, palaban at anti-imperyalistang unyon dahil ito lamang ang magtatanggol sa aming mga karapatan, hanapbuhay at makatarungang sahod.”

Sa Cavite, laganap ang sistematikong pagpapababa

Syngenta at Aventis. Suma-

saklaw ang mga korporas-

yong ito sa 60% ng

pandaigdigang kala-

kalan sa pestisidyo

at iba pang gamot

pang-peste at damo;

23% ng pan-

daigdigang

pamilihan at

kalakalan ng

mga binhi; at halos

100% ng mga binhing

transgenic. (Ang sina-

sabing *transgenic seeds*

ay ang mga binhing binago ang *genetic composition* sa

pamamagitan ng *genetic engineering* upang maging mas

Sundan sa kasunod na pahina ▶

ng sahod tungo sa P177 sa pamamagitan ng pagpa-

patupad ng *apprenticeship program*. Walang

pagkakaiba ito sa di makatarungang kontraktwalisasyon.


Pinapalala pa ito ng mahigpit na pagpapatupad ng *no*

strike – no union policy sa probinsya.

Gasolina, hindi tubig

Sa gitna ng tumitinding kahirapan dulot ng patuloy na pagbagsak ng ekonomya, krisis pampulitika, pagtaas ng presyo ng langis at iba pang bilihin, lalong titindi ang pakikibaka ng mga manggagawa sa rehiyon. Makakaasa ang rehimeng US-Arroyo na ang mga ganitong panggigipit sa mga manggagawa sa rehiyon ay di kailanman magiging malamig na tubig na magpapabuwat sa kanilang pagkakaisa. Kundi, nagsisilbi itong gasolina na ibinubuhos sa nag-aapoy na nilang damdamin.

Magiging mas maalab pa ang pakikibaka ng mga manggagawa para sa P125 na dagdag sa arawang sahod. Tatambalan pa nila ito ng pag-aalsa at welgang bayan upang pamunuan ang pagpapabagsak sa naghihingalo nang rehimeng US-Arroyo. **K**



◀ Mula sa nakaraang pahina

produktibo o kaya'y taglayin ang katangian na hangad, tulad halimbawa ng resistensya sa isang klase ng sakit o peste o taglay na bitamina.)

Mayroong *experimental farm* ang Monsanto sa Mindoro Occidental. Samantala, ang mga iba pang dambuhalang dayuhang korporasyon sa Agribusiness tulad ng Hoerscht at Bayer ay may mga *experimental farms* naman sa Calauan at Victoria, Laguna. Ang Cargill naman kasosyo ang mga Ayala ay may mga plantasyon sa Mindoro Occidental.

Ang mga korporasyong ito ang nagtutulak sa pamahalaan upang ipalaganap ang mga bagong binhi ng hybrid rice varieties (HRVs) o high yielding varieties (HYVs). Sila rin ang siyang may-ari ng mga negosyo sa *inputs* na kailangan ng nasabing mga binhi.

Sa kasalukuyan, may tatlong HYVs na ang ipinalaganap sa Pilipinas, pinangalanang PhilRice varieties ang dalawa dito (bagamat International Rice Research Institute (IRRI) ang nagbreed sa isa) at Agroseed naman ang isa pa (halimbawa nito ang mga binhi mula sa Cargill at Monsanto). May maselang katangian ang mga binhing ito. Katangitanging ang bulnerabilidad ng mga ito sa mga peste at sakit at nangangailangang gumamit ng maraming abonog kemikal upang umani.

Balik-tanaw: ang simula ng panlilinlang sa mga magsasaka at ang lalong nilang pagkabaon sa utang

Bago nagkaroon ng malaking papel ang mga dayuhang korporasyong ito sa industriya ng palay sa bansa, inilatag muna ng IRRI na matatagpuan sa Los Baños, Laguna ang tuntungan ng pagpasok ng mga dambuhalang korporasyon sa pamamagitan ng paglikha ng mga HYVs. Binigyang tulak naman ng reaksyunaryong gobierno, sa ayuda ng World Bank ang pagpapalaganap ng teknolohiya.

Sa unang bahagi, nagpadala ng mga kinatawang tagapagsalita sa mga seminar para sa magsasaka ang mga dambuhalang korporasyon. Kasabay nito, namahagi sila ng kanilang propaganda't *sample* ng produkto at ilang regalo sa mga dumadalo sa mga seminar. Noong

nalikha na ang pamilihan para sa mga gamot, nagtalaga na sila ng mga teknisyen na nagsisilbi ring ahente na nag-iikot sa mga komunidad at sakahan.

Baon na sa utang, magkakasakit pa

Dahil maselan ang binhing HYVs, nangangailangan ito ng di hamak na mas maraming abono at pestisidyo kumpara sa mga binhing karaniwang ginagamit ng mga magsasaka. Naging daan ito upang lalong mabaon sa utang at mabiktima ng usura ang dati nang kapos na mga magsasaka at manggagawang bukid. Habang nana-natiling maliit ang kabahagi ng mga magsasaka sa ani sa lupa, walang ibang makikinabang dito kundi ang mga

Sundan sa kasunod na pahina ▶

Baon na sa utang, nililinlang pa ni Gloria

Bagamat mapaminsala sa mga magsasaka at manggagawang bukid, nagkukumahog pa rin ang rehimeng US-Arroyo na maipalaganap ang paggamit ng mga HYVs sa kanyang proyektong Gloria Rice. Sa proyektong ito, hinihikayat ng rehimen ang mga magsasaka na magtanim ng mga binhing HYVs.

Isa sa ginamit na *pilot* erya ng nasabing *hybrid rice* ang rehiyong Timog Katagalugan. Nagbigay ang pamahalaan ng mga insentibo sa mga nalinlang nilang magsasaka upang lunukin ng mga ito ang pakete ng teknolohiyang kakabit ng nasabing binhi.

Si Gloria mismo ang nagsisilbing propagandista para sa mga HYVs at ginagastos pa niya ang salapi ng sambayanan upang magkamal ng malaking tubo ang mga dambuhalang dayuhang korporasyon.

Ang rehimeng US-Arroyo rin ang nagtulak sa pagpapatupad ng liberalisasyon at deregulasyon sa pangangalakal ng palay at ang pikit matang paglunok sa lahat ng mga dikta ng World Bank at ng mga kasunduan sa GATT-WTO na nagpapahirap sa mga magsasaka at manggagawang bukid. Marapat lamang na mga magsasaka at manggagawang bukid ang maging pangunahing pwersa na magpapabagsak sa sumusuray nang rehimen. **K**

Deregulasyon at liberalisasyon ng industriya ng palay sa Pilipinas -- pakana ng mga imperyalista

Imbes na harapin ang mga batayang suliranin ng mga magsasaka sa mga palayan upang matiyak ang seguridad sa pagkain ng bansa, mas pinipili pang solusyon ng Rehimeng US-Arroyo ang pag-aangkat ng bigas. Sabihin pang nasa bansang Pilipinas ang sobra-sobrang rekurso upang gawing sapat ang produksyon ng bigas, patuloy namang nagiging sunud-sunuran ang gubyerno ni Arroyo sa dikta ng kanyang mga imperyalistang amo.

Tulak ng kasunduang General Agreement on Tariffs and Trade - World Trade Organization (GATT-WTO) ng 1994 ang patakaran ng pag-aangkat ng bigas ng bansa. Nakabalangkas ito sa patakaran ng deregulasyon at liberalisasyon ng kalakalan ng


palay ng naghaharing rehimen.

Sa katunayan ayon sa National Food Authority (NFA), 90.425% ng kabuuang ipinamahagi nitong bigas mula 1995 hanggang 1999 ang inangkat mula sa ibang bansa.

Mula 1996 hanggang 2000, umaabot sa 1,041,000 metriko tonelada (MT) ang karaniwang inaangkat na bigas ng Pilipinas taun-taon.

Noong 1999, umangat pa rin tayo ng 999,612 MT ng bigas sa kabila ng kabuuang ani ng bansa na 11.8 milyong MT ng palay. Nilagpasan pa ng pamahalaan ang 950,000MT na itinakdang dapat angkatin ng bansa para sa naturang taon batay sa *minimum access volume* o MAV na itinakda sa ilalim ng 1994 GATT-WTO.

Sundan sa kasunod na pahina ►



◄Mula sa nakaraang pahina

PML na di nakikibahagi sa gastos ng magsasaka sa produksyon. At siyempre ang mga dambuhalang dayuhang korporasyong magkakamal ng limpak-limpak na tubo mula sa pagbebenta at pagpapautang ng mga binhi, abono at pestisidyo.

Ang mga magsasaka at manggagawang bukid din ang pangunahing sumasapo ng mapanirang epekto ng malaganap na paggamit ng abono, pestisidyo at iba pang kemikal sa produksyon. Dagdag na pahirap ang dulot nitong sakit at sa ilang kaso, ng pagkamatay sa lason mula sa mga kemikal na ito. Sa mga sakahang intensibo na ang aplikasyon ng mga gamot at kemikal, napipinsala ng lason at sakit maging ang mga hayop-pantrabaho at sa maraming kaso nagiging dahilan ng pagkamatay ng mga ito.

Isang halimbawa ang karanasan ng mga magsasaka sa Quezon kung saan namatay ang kanilang mga kalabaw

dahil sa lason mula sa mga sakahan na umagos sa ilog na pinalulububan ng mga kalabaw. Kaya napilitang gumamit ng *hand tractor* ang karamihan sa kanila na naging dagdag na kita para sa mga PML na nagmamay-ari ng nasabing kagamitan pero dagdag namang pasanin at utang ng mga magsasaka.

Apektado rin ang kapaligiran – nalilipol ng mga kemikal na ito ang mga lamang-ilog na pinagkukunan ng dagdag na pagkain ng mga magsasaka at ng buong komunidad sa mga kanayunan.

Sa kabila nito, nagpipista sa tubo ang mga dayuhang korporasyon. Sila ang nagkakamal ng yamang nagmula sa industriya ng palay hindi lamang sa ating rehiyon at bansa kundi sa pandaigdigang saklaw. Kaya't marapat lamang na ilantad at tutulan ang pagpapalaganap ng mga HYVs. Marapat lamang na mag-organisa at lumaban ang mga magsasaka at manggagawang bukid upang hadlangan ang pagpapalaganap ng HYVs. **K**

Ipagbunyi ang tagumpay ng ating pagkakaisa Higit na palakasin ang hanay, patuloy na ipaglaban ang kabuhayan at karapatan ng mga maglulukad

*Halaw sa pahayag ng mga maglulukad sa kulumpon ng
baryo sa isang bayan sa Quezon.*

Walang pagdadalawang isip, iwinaksi ng mga maglulukad ang matagal at malalim na pagkakanim ng pyudal na kaisipan, nang pag-aalinlangang harapin ang panginoong maylupa.

Sa nakaraan, karaniwang alinlangan ng mga maglulukad kapag may nais ilapit na suliranin at kahilingan sa maylupa ay “Baka magalit ang panginoong maylupa, baka tayo patalsikin sa paglulukad. Baka hindi na magpautang, wala tayong malalapitan. Pare, Minyag, Ninong, Kuya, Tiyo ko ang panginoong maylupa, nakakahiya! May malapit na kampo ng militar, baka tayo dahasin!

Nagliliyab ang militante at mataas na diwa ng mga

maglulukad. Nangahas nilang lampasan ang popular na kasabihang “Gustong makapulot ayaw magpakisot” at itrinansporma ito sa positibong aksyong masasa...” Hinawakan ang apoy at sama-samang namuhag. Batid nila na maari silang makisot, pero gumawa ng hakbangin upang makaiwas sa kisot sa gayo’y matamasa ang matamis na pulot na sa mahabang panaho’y ipinagkait...” Isang aral na upang makamit ang matamis na tagumpay, kinakailangang sumama sa pamumuhag o sa pagkilos, di dapat bitiwang

Sundan sa kasunod na pahina ►



◀ *Mula sa nakaraang pahina*

Kung tutuusin, di naman natin kailangang umangkat ng bigas sapagkat sapat-sapat ang produksyon natin ng bigas kumpara sa pangangailangan o konsumo. Taong 1998 lamang nang may naitalang kakulangan sa suplay na 1 milyong MT. Subalit nang taon ding ito, umangkat ang pamahalaan ng 2.1 milyong MT ng bigas.

Dahil sa probisyong MAV sa ilalim ng kasunduang GATT-WTO, obligado ang pamahalaang mag-angkat ng bigas mula sa iba’t-ibang mga bansang miyembro ng GATT-WTO kahit na sapat naman ang lokal na produksyon ng bigas. Sa katunayan, karamihan ng bigas na “stock” ng NFA ay mula pa sa Vietnam.

Pinalala ng kasunduang 1994 GATT-WTO ang hikahos na kalagayan ng mga magsasaka dahil sa sapilitang pag-aangkat ng bigas mula sa ibang bansa kasama na ang US. At dahil sa di pantay na kalakalan kung saan may mga subsidyo pa ring tinatamasa ang mga magsasaka sa mga bansang nagluluwas ng kanilang bigas, mas murang di hamak ang inaangkat na bigas ng bansa.

Di nakapagtataka kung bakit hindi tumaas ang presyo ng produktong palay ng milyun-milyong Pilipinong magsasaka dahil direktang kakumpitensya nito ang bigas na mula sa bansang may buong suporta ng kani-kanilang pamahalaan. Sadyang lalong maghihikahos ang pinagsasamantalahan at binubusabos na mga Pilipinong magsasaka sa gitna ng patuloy na pangangayupapa ng gubyerno ni Arroyo sa dikta ng kanyang mga imperyalistang amo. **K**

Sa kabila ng murang pag-aangkat nito, Bakit patuloy pa rin ang pagtaas ng presyo ng bigas?

Sobra-sobra man ang inaangkat na murang bigas ng NFA, di pa rin bumababa ang halaga ng bigas sa palengke. Ayon mismo sa isang *source* mula sa NFA, ang Big 7 o Binondo Rice Cartel ang salarin dito. Ang Big 7 Rice Cartel kasabwat ang mga malalaking *trader-millers* sa mga probinsiya ng Timog Katagalugan at sa buong bansa ang may kontrol sa kalakalan ng bigas kaya’t sila rin ang nagdidikta ng presyo ng bigas sa pamilihan. **K**

◀ *Mula sa nakaraang pahina*

ang apoy at tuluy-tuloy na itutok sa bahay ng pukyutan. Mula sa iilang namumuhag at may hawak ng apoy, kailangang lumahok ang lahat upang hindi mabantulot ang pamumuhag, kailangang patuloy na kumilos upang tuluyang magtamasa ng papalaking tagumpay.

Ito ang ating buhay na karanasan. Natuto tayong humarap sa panginoong maylupa, mangatwiran at igiit ating mga kahilingan. Muli ay napatunayan natin ang kahalagahan ng sama-samang pagkilos. Nagbigay ito sa atin ng mataas na pagtitiwala sa ating sariling lakas. Naging mabunga ang ating mataas na pagpapahalaga at kasigasigan sa pagdalo sa mga pagpupulong, pag-aaral, mga inilunsad na pagkilos at pakikipag-negosasyon sa panginoong maylupa. Minsan pa'y pinatunayan natin ang kahandaan sa sakripisyo. Pansamantalang iniwan natin ang linang, kaingin at mga pang-araw-araw na gawain sa bukid at sa ating mga pamilya. Isang kahandaan na kailangan upang makamit natin ang ating mga minimithing kahilingan.

Patunay nito, nagkamit tayo ng mga panimulang tagumpay sa mga inilunsad na negosasyon sa maylupa tulad ng mga sumusunod;

1. Pagbabago ng partehan mula 60-40 at 50-50 (mga relasyong pabor sa maylupa) tungong 50-50 na paiiralin sa lahat ng maglulukad ng maylupa at sagot ng maylupa ang gastos sa kawit, bunot (tapas), konsumo at kalahati ng parada at karga.
2. Pag-aalis sa mga iligal na kaltas tulad ng resikada, taktak at tara – hindi kakaltasan ng timbang ang maayos na pagkakaluto ng lukad na isinusulit; ang sako ay titimbangin at ang aktwal na timbang nito ang siya lamang kakaltasin.
3. Magkakaroon ng maayos na pisada at pagkukwenta at maayos na pagtitimbang ng lukad.

4. Kasiguruhan at pagkilala sa karapatan ng maglulukad na hindi mapapataksik sa paglulukad.
5. Pag-aalis ng kinakaltas na bayad sa paghakot ng jeep sa mga isinusulit na lukad.

Sa kabuuan, kagyat na makikinabang sa mga tagumpay na ito ang lahat ng maglulukad na nagsusulit maging ito man ay nagsangla o kabakas ng maylupa. Higit na mas malaki ang bilang ng mga magsasakang nagsusulit ng lukad mula sa iba pang magsasaka sa niyugan na nagsusulit o nagbebenta ng lukad sa maylupa/ komprada dahil sa pag-aalis ng mga iligal na kaltas, daya sa kwentahan at sa timbang.

Mga kapwa maglulukad, ang ating tagumpay ay panimula pa lamang. Upang higit tayong magkamit ng mga kongkretong tagumpay at kahilingan, kailangan nating higit na palakasin, palawakin ang ating hanay sa pamamagitan ng masikhay na pagmumulat, pagpopropaganda-ahitasyon, pag-oorganisa sa kapwa

Sundan sa kasunod na pahina ▶



Maglulukad

*May himig sa lukaran
sa kwento at kapihan
ng mga maglulukad
halina't ating samahan
mga api sa niyugan
sa pagtigkal sa yaman
layuning kasaganaan*

*bisig ay namimitig
ngalay pa ang leeg
sa maghapo't magdamag
na paglulukad sa ganid
bawat bukal ng pawis
sa pagal mong katawan
iisa ang nais*

*maglulukad, maglulukad
pangarap mo kinabukasan
sa iyong pagsusulit
may bahaging sasapit*

*maglulukad sa niyugan
gulugod kang walang yaman
daan taong naghihirap
habang ang maylupa'y bundat*

*sa harap ng komprada kisap mata
sang pitik sa timbangan
ay pagsukat ng pinagpagalan
ang bigat ay sa panginoong maylupa
at sa iyong palad ay kawalan*

*Tayo na, tayo na!
maglulukad magsama-sama
rebolusyong agraryo
isulong at ipaglaban.*


*Sigaw ng maglulukad:
baguhin ang partihan
tersyong balikdad, ipaglaban
pawiin iligal na kaltas
resikada, taktak at tara
itaas ang presyo ng kopra*

◀ *Mula sa nakaraang pahina*

maglulukad/magsasaka sa niyugan sa loob ng baryo at karatig nito.

Sa kasalukuyan, patuloy ang pagtindi ng kahirapan. Walang habas ang pagtaas ng presyo ng mga pangunahing bilihan dulot ng patuloy na pagpapatupad ng rehimeng US-Arroyo ng mga kontra-mamamayang patakaran at progarama tulad ng patuloy na pagtaas ng presyo ng langis at mga dagdag na pasanang buwis. Patuloy ang pagtindi ng kahirapan sa kanayunan. Nananatiling walang sarili at kulang ang lupa ng masang magsasaka. Biktima ang magsasaka ng mataas na upa o buwis sa lupa habang patuloy ang pagkamal ng yaman ng mga panginoong maylupa. Ibayong dumarami ang mga manggagawang bukid bunga ng malawakang pagpapalayas at pangangamkam ng lupa sa masang magsasaka. Dahil dito, napipilitang pumasok sa iba't ibang gawain ang mga manggagawang bukid kapalit ng napakababang sahod. Dagdag pa, nariyan din ang mataas na interes sa utang – laganap ang pang-uusura. Bagsak ang presyo ng produktong bukid. Sa lahat ng ito, iilan ang nakikinabang ang nagpapasasa sa pinaghirapan ng masang magsasaka. Nanatili ang paghahari ng mga panginoong maylupa, burgesya komprador at dayuhang kapitalista sa ating lipunan. Namamayani ang iba't ibang anyo ng pyudal at malapyudal na pagsasamantala sa masang magsasaka. Patuloy itong pinanatili at pinoprotektahan ng salot na rehimeng US-Arroyo. Pinatitindi ang pandarahas sa mamamayan at paglabag sa karapatang pantao lalo na sa kanayunan. Ginagamit nito ang mga mersenaryong AFP-PNP at mga CAGU upang patahimikin ang magsasakang nakikibaka para sa Tunay na Reporma sa

Tangkilikin ang:



Mga piling awitin ng rebolusyong Pilipino

Lupa. Patunay nito, patuloy ang deployment at walang patumanggang operasyong militar sa ating mga baryo. Lumikha ito ng takot, pangamba sa ating araw-araw na buhay. Mistulang Martial Law sa ating mga baryo, ipinatutupad ngayon ang *curfew* at pagbabawal sa mga mamamayang lumabas lalo na sa gabi. Sinusupil ang malayang paggalaw ng mamamayan sa kanayunan.

Dahil sa mga malaking kasalanan sa mamamayan ng salot na si GMA, nanginginig na ito sa takot sa lumalakas na kilusan ng mamamayan upang patalsikin siya sa poder. Tampok ngayon ang nabistong pagtawag niya kay COMELEC Commisioner Garcillano upang tiyakin ang kanyang panalo noong nakaraang eleksyon. Sa pagkakabisto dito, sumambulat ang galit ng mamamayan. Anumang oras, magiging dambulatang lakas ang galit na ito na magpapatalsik kay GMA sa poder. Kailangang iugnay natin ang ating pakikibaka sa kagyat na kahilingan ng mamamayan na patalsikin sa poder si GMA. Maglunsad at lumahok tayo sa mga pagkilos.

**Baguhin ang partiha, ipaglaban
ang tersyong baliktad!**

Pawiin ang iligal na kaltas – resikada, taktak at tara!

Ipaglaban ang kasiguruhan sa lupa!

Itaas ang presyo ng lukad!

Ipamahagi sa maliliit na magniniyog ang coco levy fund!

Tunay na reporma sa lupa, ipaglaban!

Lupa – hindi militarisasyon, karapatan ipaglaban!

Patalsikin ang kontra-magsasakang si Gloria! K

► *Mula sa pahina 12*

tumitindi rin ang mga batayang paglabag sa karapatan ng mga manggagawa. Hindi maaring maging kimi na lamang ang kilusang paggawa sa ganitong kalagayan. Kailangang lumaban.

Batay sa mga datos na nakalap ng mga manggagawa sa Cavite, di baba sa 21 militanteng unyon ang nakaranas ng sistematikong pagtatangkang buwagin ng sabwatan ng pamahalaan at mga kapitalista. Di baba sa 11,000 manggagawa ang nawalan ng trabaho, naobligang magpahinga, hinaras, iligal na inaresto o sinampahan ng mga gawa-gawang kaso. Nais sagkaan ng ganitong mga pakana ang pakikibaka ng mga manggagawa sa kanilang karapatan at kagalingan.

Rally inilunsad laban sa JBIC

KINONDENA NG MGA ORGANISASYON NG MAMAMAYAN SA Timog Katagalugan (TK) ang isang dambuhalang bangkong Hapon sa pagiging anti-mamamayan nito. Daan-daang magsasaka, manggagawa, katutubo, mangingisda, maralitang tagalunsod at kabataan ang lumahok sa isang kilos-protesta na inilunsad sa harap ng opisina ng bangko sa Makati noong Hunyo 9. Bahagi ito ng serye ng mga pagkilos na bumatikos sa pagdiriwang ng huwad na kalayaan noong Hunyo 12.

Pinangunahan ng Bagong Alyansang Makabayan – Southern Tagalog (Bayan-ST), Katipunan ng mga Samahang Magbubukid sa TK (Kasama-TK) at iba pang progresibong organisasyon ang pagkilos. Binatikos ng mga raliyista ang pagpopondo ng dambuhalang usurerong Japan Bank of International Cooperation (JBIC) sa anti-mamamayan at maka-imperyalistang Proyektong Calabarzon.

Ang Proyektong Calabarzon ay isang gradyosong plano na binalangkas ng pasistang-diktadurang US-Marcos noong maagang bahagi ng dekada 80. Sumasaklaw ito sa mga probinsiya ng Cavite, Laguna, Batangas, Rizal at Quezon. Pormal itong inilunsad ng rehimeng US-Aquino noong Oktubre 1990.

Isa sa mga pangunahing promotor ng Proyektong Calabarzon ang Japan International Cooperation Agency. Malaki ang naging bahagi ng ahensiyang ito sa pagbalangkas ng proyekto.

Ayon sa mga lumahok sa kilos-protesta, ang Proyektong Calabarzon ang salarin sa malawakang pangangamkam at pagpapalit-gamit sa lupa dito sa rehiyon. Isa sa mga tampok na halimbawa nito ang Proyektong Harbor Town sa Hacienda Looc, Nasugbu, Batangas. Sa kasong ito, kinakamkam ng Fil-Estate Properties, Incorporated (FEPI) ng Pamilya Sobrepeña katuwang ang Manila Southcoast Development Corporation (MSDC) ng mga Sy ang 8,650 ektaryang lupa. Pag-aari at pinagyayaman ang lupaing ito ng may 10,000 magsasaka at mangingisda na ang marami’y nawalan na ng ikabubuhay at ang natitira’y ginigipit pa dahil lamang

sa konstruksyon ng Harbor Town.

Bahagi ng Proyektong Harbor Town ang pagtatayo ng *golf course*, *beach resort* at daungan ng mga yate sa pinagtutunggaliang lupa.

Samantala, isa rin ang JBIC sa nagpopondo sa Proyektong Laiban Dam ng Rehimeng US-GMA. Sa pagtatayo ng dambuhalang Laiban Dam, mahigit 10,000 magsasaka, katutubong Dumagat at Remontado mula Tanay, Rizal at Heneral Nakar, Quezon ang palilikasin. Nakaambang palubugin sa nasabing proyekto ang mahigit sa 27,600 ektarya ng produktibong palayang may patubig at hitik sa yamang kagubatan at kabundukan. Sumasaklaw ang proyekto sa walong barangay sa hangganan ng Rizal at Quezon. Pito rito ang palulubugin sa tubig.

Kasunduan upang gawing *strike free* ang Cavite, kinundena

MARIING TINUTULAN NG MGA MANGGAGAWA SA CAVITE ang isang kasunduan upang gawing *stike-free* ang probinsiya. Ayon sa mga manggagawa, kikitlin ng kasunduan ang batayang karapatan ng mga manggagawa na magbuo ng unyon at makibaka para sa kanilang kagalingan.

Sa isang kasunduang tinaguriang “Panlipunang kasunduan para sa industriyal na kapayapaan, estabilidad, preserbasyon ng trabaho at pagpapalakas ng pag-eempleyo”, idineklara na “strike free” na ang Cavite. Pinangunahan nina Gob. Irineo “Ayong” Maliksi, Undersecretary Danilo Cruz ng Department of Labor and Employment (DoLE), mga kapitalista at mga kinatawan ng dilawang unyon ang paglagda sa kasunduan.

Ayon sa mga militanteng manggagawa, imposibleng maging “strike free” ang probinsiya. Sa gitna ng matinding krisis pang-ekonomya at kahirapang dinaranas ng mga manggagawa sa panahon ng administrasyon ni Maliksi,

Sundan sa pahina 11 ►